

فتافيت سلمى

انا سلمى جدي سريس
الأصل والمعني
في الغدر اصلي ماليش
وعاشقة للمعني

.....

ابويا رباني ع الأصل من صغري
علمني انظر امام والمشي في الدوغري
ولا عمري ملت شمال
والغالي كان مهري

.....

قلبي انا في هواك يدوب
حتي لو عدت قرون
أنت تاج كل القلوب
لو جابولي مال قارون

.....

ايوة عشقك بس لكن
ساعة يوجعني كلامك
والهوي في القلب راكن
مش بأشوف الا ملامك

.....

هو يعني القطر فاتك
كل شئ من صنع ايدك
ياللي توهب لي حياتك
قلبي اهو ساكن في جيدك

.....

كل يوم قرب بخطوة
تلتقي قلبي ف طريقك
اصل حبي ماكانش نزوة
والسطور اهي فوق جبينك

.....

ايوة غيرتي تبقي ميزة
يا اللي قلبي عليك بيصفح
ذكري واللّهي عزيزة
انت لأخر القلب مطرح

.....

قلبي متشعل نيران
وانت تحلف لي بباطل
هات كمان حتي الميزان
والحقيقة بلاش تماطل

.....

كل واحد له ظروفه
والحجج ما بتنتهي
واللي يغلط يا كسوفه
اما ناس ما بتختشي

.....

ليه بتبعد عن حبيبك
والعروق فيها الرطوبة
او عي لا تسيبني لغريمك
واتحذف كام الف طوبة

.....

أاه يا حب ناره حامية
قلبي موجوع مش سليم
لو مراية الحب عامية
يبقي انا عايشة ف جحيم

.....

انت عامل ليه فتوة
كل ساعة القاك تنثور
انت تبقي صاحب مروه
ولا قاسي يا عم غور

.....

شفت ياما كثير مقاسي
والله هو ليا حاسب
ما التقيت أهلي وناسي
وعمري ما حسبت المكاسب

.....

ياللا قرب جنب مني
اصل أنا عشقك صراحة
واوعي مرة يوم تلومني
عمري ما اهدي لك مساحة

.....

قلبي أخضر زي قلبك
وقت ما تقوم الشدايد
والصعاب انا شفت قبلك
والتمن مدفوع فوايد

.....

ربي قال ان احنا نسعي
لأجل من نحقق طموح
أجري اصل الدنيا واسعة
لما نيجي او نروح

.....

انا حملي ثقيل
وانحني عودي
يا ليالي الفرح
قوام عودي
واعزف وياكي
علي عودي

.....

يا اللي هواك قدر
علي قلبي صار مكتوب
حبي ليك ده اجر
يمسح كل الذنوب

.....

مشتاق يا قلبي
لييوم العيد
والاحزان تداري بعيد
تصبح احبه وايد ف ايد
وفرحة جاية بدون مواعيد

.....

تعبت جدا وقلبي داب
تعبت من طول الغياب
وامتي أرتاح م العذاب
حد يرد باي جواب

.....

باحبك وبتمناك
تكون دايم معايا
لو تفكر مرة تبعد
تبقي ليا دي النهاية

.....

من يومي شايقة نفسي
حرة وروحي عفيفة
ولا حد في الكون ده زيي
حتي الزناتي خليفة

.....

يا طه نادينا نلبي نداك
نكحل عيوننا بفرحة لقاك
نروح المدينة نصلي هناك
يا رب تسعدني بفرحة لقاك

.....

بأكره كل حياتي معاك
بأكره ضعفي وقت لقاك
تعرف حتي باكره ايه
بكره اسمي لو تناديه

.....

انا قلبي صابه الوجد
والأهه سكنت فيه
بعدك عليل بالقوي
مين غيرك راح يشفيه

.....

انا دم وانت وريد
ساكنه بتجري فيه
لو عني لحظة تغيب
قولي انا احيا ليه؟؟

.....

تقلت حمولي ما شالها
علي ضهري تقلت حموله
ولما سابني ما شالها
قلبي وروحي حموله

.....

قالي عليا اسندي
ماحد غيري يشيلك
ولما تقلت حمولي
قالي انا لقيت بديك

.....

انا راح الف الدنيا بحالها
مش راح اكل وشايله حمول
ربك قادر يصلح حالها
بس الدعوة تكون بقبول

.....